

02/02/2003

Tahun Baru Cina disambut sederhana

KUALA LUMPUR: Kedatangan 'Tahun Kambing' pada perayaan Tahun Baru Cina kali ini disambut secara sederhana tetapi kemeriahan jelas terbayang menerusi majlis rumah terbuka yang diadakan di seluruh negara.

Di ibu negara, parti komponen Barisan Nasional seperti MCA dan Gerakan meneruskan tradisi mengadakan rumah terbuka. Antara tetamunya Perdana Menteri Datuk Seri Dr Mahathir Mohamad, timbalannya Datuk Seri Abdullah Ahmad Badawi, Menteri Kabinet, duta asing dan pemimpin masyarakat.

Dr Mahathir dan isteri Datin Seri Dr Siti Hasmah Mohamad Ali memulakan sambutan Tahun Baru Cina dengan mengunjungi rumah terbuka MCA di Dewan Lee San Choon di Wisma MCA di sini.

Perdana Menteri dan Timbalan Perdana Menteri kemudian menghabiskan masa sejam di rumah terbuka parti Gerakan di Cheras dan dirai Presidennya, Datuk Seri Dr Lim Keng Yaik.

Kedua-dua pemimpin tertinggi itu kemudian menghadiri majlis makan tengah hari anjuran Menteri Sains, Teknologi dan Alam Sekitar, Datuk Seri Dr Law Hieng Dieng.

Di PULAU PINANG, Yang Dipertua Negeri Tun Abdul Rahman Abbas dan isteri, Toh Puan Majimor Shariff mengunjungi rumah terbuka Tahun Baru Cina yang diadakan oleh Ketua Menteri Tan Sri Dr Koh Tsu Koon di Fort Cornwallis di sini semalam..

Koh dan isteri, Puan Sri Chui Kah Peng turut menerima kunjungan daripada Anggota-anggota Majlis Mesyuarat Kerajaan Negeri, pemimpin politik serta pemimpin pertubuhan-pertubuhan bukan kerajaan (NGO).

Sementara itu, Pengerusi Jawatankuasa Kerajaan Tempatan, Alam Sekitar dan Pengurusan Lalulintas Negeri, Datuk Dr Teng Hock Nan dan isterinya, Datin Chang Lee Lee turut mengadakan rumah terbuka di Che Hoon Khor Moral Uplifting Society di sini. Antara yang mengunjunginya bekas Yang Dipertua Negeri Tun Dr Hamdan Sheikh Tahir dan isteri, Toh Puan Zainab Baharuddin serta anggota keluarganya.

Di SEREMBAN, MCA dan Gerakan turut mengadakan rumah terbuka sempena sambutan Tahun Baru Cina. Turut memeriahkan sambutan itu Menteri Besar Tan Sri Mohamed Isa Abdul Samad dan isteri Puan Sri Hazizah Tumin, Anggota Exco, wakil rakyat dan pemimpin masyarakat. Lebih 5,000 orang memeriahkan sambutan itu.

Di KUANTAN, sambutan meriah dengan sanak saudara pulang ke rumah ibu bapa masing-masing bagi makan besar petang semalam sebelum mengunjungi rumah rakan dan sahabat handai. Orang ramai pula mengunjungi kawasan perkelahan di Teluk Cempedak dan Cherating.

Di KOTA BHARU, Rumah terbuka anjuran Pusat Khidmat Dewan Undangan Negeri kawasan Kota Lama di sini turut dihadiri Timbalan Menteri Besar Datuk Abdul Halim Abdul Rahman. Tarian Singa turut menarik perhatian orang ramai yang hadir pada majlis itu.

Di KANGAR, Antara yang mengadakan rumah terbuka ialah Pengerusi Jawatankuasa Perumahan dan Kerajaan Tempatan negeri Loh Yoon Foo dan Ketua Wanita MCA Perlis, Oui Ah Lan.

Ia dimeriahkan perlumbaan peringkat kedua kejohanan lumba basikal Le Tour de Langkawi sejauh 148.3 kilometer yang bermula di Kangar dan berakhir di Butterworth. Menteri Besar Datuk Seri Shahidan Kassim melepaskan pelumba di padang Majlis Perbandaran Kangar.

Di KUALA TERENGGANU, Tahun Baru Cina disambut meriah dan penuh harmoni dengan masyarakat lain mengunjungi rumah terbuka. Turut mengadakan majlis

itu ialah Presiden Dewan Perniagaan dan Perindustrian Cina Terengganu, Low Kiang Chuan.

Di IPOH, lebih 2,000 orang menghadiri rumah terbuka Pengerusi Jawatankuasa Infrastruktur dan Kemudahan Awam, Datuk Ong Ka Chuan yang juga Pengerusi MCA Perak. Antara orang kenamaan yang hadir ialah Menteri Besar Datuk Seri Tajol Rosli Ghazali, Setiausaha Kerajaan Negeri Datuk Isahak Yeop dan Pengerusi MIC Perak Datuk G. Rajoo.

Tajol Rosli meluangkan masa mengunjungi rumah terbuka Pengerusi Jawatankuasa Perbandaran dan Kerajaan Tempatan, Datuk Chang Ko Youn. Kerajaan Negeri akan menganjurkan sambutan Tahun Baru Cina peringkat negeri 7 malam ini di Padang Ipoh yang dijangka dihadiri lebih 50,000 orang.

Di ALOR STAR, Menteri Besar Datuk Seri Syed Razak Syed Zain mengunjungi sambutan Tahun Baru Cina anjuran MCA dan Gerakan Kedah.

Pengerusi MCA Kedah Datuk Beh Heng Seong dan Timbalan Menteri Dalam Negeri Datuk Chor Chee Heung meraikan kira-kira 1,000 tetamu pelbagai kaum pada majlis itu yang diserikan dengan persembahan tarian naga, nyanyian serta pertunjukan opera Cina yang didatangkan khas dari China.

Di KOTA KINABALU, Ketua Menteri, Datuk Chong Kah Kiat mengadakan rumah terbuka di kediaman mereka di Jalan Telekom, Kudat. Ibu negeri agak lengang apabila kebanyakan premis perniagaan ditutup sempena sambutan itu dan acara rumah terbuka yang rasmi hanya akan berlangsung esok.

Di KUCHING, hujan lebat yang turun sejak awal pagi tidak menjejaskan sambutan Tahun Baru Cina dengan tradisi rumah terbuka.

Yang di-Pertua Negeri Tun Abang Muhamad Salahuddin, Ketua Menteri Tan Sri Abdul Taib Mahmud, ketua-ketua kaum dan ketua-ketua jabatan kerajaan antara 3,000 tetamu majlis itu.

Di JOHOR, Menteri Besar, Datuk Abdul Ghani Othman turut mengunjungi rumah terbuka anjuran pemimpin MCA negeri dan Dewan Perniagaan dan Perindustrian Tionghua Johor Bahru.